

四庫全書

集部

欽定四庫全書

集部

蠹齋鉛刀編卷一至五

詳校官庶吉士臣吳烜

主事臣呂雲棟覆勘

總校官進士臣繆琪

校對官中書臣李斯咏

謄錄監生臣劉清礪

欽定四庫全書

集部四

蠹齋鉛刀編

別集類三 宋

提要

臣等謹案蠹齋鉛刀編三十二卷宋周孚撰孚字信道濟南人寓家丹徒乾道二年進士官真州教授集首有其友京口陳珙序稱遺文共三十卷儀真縣志並同而鄜延解百禴跋語則稱三十二卷正與今集本相合蓋珙

序專指詩文而言末二卷為非詩辨妄原有別本單行百禰取以附入故通為三十二卷耳又宋詩紀事稱孚卒後辛棄疾刊其集今考集中多與棄疾贈答之作其契好固有素但並無刊集之文世所傳本實淳熙己亥歲百禰為鏤板以傳跋語可証未知宋詩紀事何所據也孚七歲通春秋為詩初學陳師道進而學黃庭堅俱能得其遺矩詩中分注自

甲戌歲始距其卒淳熙初凡二十餘年蓋皆  
其中年之作學問日進故大抵詞旨清拔無  
纖仄卑俗之病文章不事雕績而波瀾意度  
亦往往近於自然其駁正鄭樵詩辨妄之誤  
立論尤極詳允在南渡時雖未卓然成家亦  
可謂尚有典型者矣乾隆四十三年五月恭  
校上

總纂官臣紀昀臣陸錫熊臣孫士毅

總校官臣陸費墀

蠹齋鉛刀編原序

歐陽公之序蘇子美曾南豐陳後山之序王平甫皆悲其不遇以死其言反覆哀抑有大不釋然者人之讀之知其辭之緩而不知其意之切也夫二公之材高視一世文可施諸典冊詩可薦諸聲歌而坎壈流放曾不得少用其所長而夭死繼之一時交舊論次其平日之文序其窮而閔其志能無哀乎所以深悲而痛恨者自其情也余之師友周公孚字信道自號蠹齋天資穎悟七

歲通春秋左氏傳既長於書無所不闕博聞彊記而尤  
邃於楚騷遷史唐韓杜氏之詩文國朝諸公名世之作  
出入貫穿造詣其畛域掇拾其精華始刻意於詩以後  
山為法其後由陳而黃黃而杜屬思高遠鍊句精穩少  
而工壯而新晚而平淡為文長於叙事簡潔而峻厲不  
喜襞積雕繪循理而言理盡言止公之於詩文蓋如此  
登第十年始為真之郡博士竟卒於官仕止於一命壽  
不登五十其窮殆與子美平甫類而不逮二公者二公



所與遊皆一代宗工足以自託不腐公常恨不及見前輩不斬今之人知一時顯人亦未有能知公者以故名未大耀公既沒之二年平陽解君伯時得公之遺文古賦古律詩表牋啟書序記疏青詞贊碑銘共三十卷目曰鉛刀編者屬余為之序余少從公游其學蓋得於公老不加進思公之不復見也未嘗不潛焉以悲伯時公之死友也嘗仕為尚書省監門聞公一言棄歸力學其志操有足尚者公之自真歸葬也伯時營護之力為多

翟公有言一死一生乃知交情余於伯時見之淳熙己  
亥仲秋六日京口陳珙序

欽定四庫全書

蠹齋鉛刀編卷一

宋 周孚 撰

古賦

歸愚堂賦

蹇余生之多艱兮慨余曩之失謀委余佩於蔓草兮捐  
余冠於濁流進猖狂以干利兮與一世而並驚棄餘皇  
而涉川兮策疲駕而爭路蹈荆榛而股夷兮水減頂而  
猶渡當衆兆之所咥兮石友哀而不忍視蚊負山而欲

覆兮獨施施而不之畏責扶搖於斥鷃兮世固知其不能致也拔六翮而自傳兮吾亦知其為身之累也以斯術而欲達兮固一步而百躓惟夫人之所能兮蓋在夫稟賦之初羌造物之迪余兮不以智而以愚洵天命之固然兮吾何憚而不改圖忽歲月之不留兮駭東隅於桑榆誠不忍其罵譏兮胡不返余故居去十年羞余歸兮足欲進而趑趄恍室廬之何在兮悵選術之欲蕪揖北山以問津兮挽衛蘧以相塗送余者自崖而返兮惜

于茲休吾車面余垢之少滌兮喉余喘之少蘇進苦茶  
以自犒兮招鳴鳩而相與娛覽浮雲之相蕩兮笑衝風  
之疾驅幸夫今之至安兮悼往昔之多虞唯蹈道之未  
深兮尚恐回之笑余釣播斯物兮孰非自然翼者不馳  
兮陵者不淵退縮而休兮茲吾所以受之于天吾非懟  
於斯人兮因偃蹇而自欺唯焦僥毚瘠世無用兮遜余  
志而不敢違彼前人之猖披兮不自悟其不辰始誇詡  
以植朋兮終申申而尤人誣溪谷以自解兮信雖愚而

非真幸余質猶未虧兮佩茲韋而終身重曰少日已衰  
老復情兮勇進不可守茲懦兮舉比之炳以充貨兮蝸  
潛于殼可無禍兮歸休乎茲以復吾過兮

濟南辛侯作奠枕樓於滌陽余登而樂之遂為  
之賦

稅余車於南樵兮歲方迫於凜秋紛叢薄與灌莽兮無  
以蕩吾之幽憂杖予策而出游兮舒予情於茲樓脫塵  
坌之喧卑兮揖羣山於几席嶽岑巖崿以獻伎兮余應

接之不暇給清風颭以來騰兮暖歸雲之娛予渺大江  
之何許兮鍾阜淡其欲無酹文饒於懷嵩兮弔子羽於  
陰陵面清流之故關兮快暉鳳之就擒放遠目以四顧  
兮恐夕陽之西沈振予衣而欲起兮顧坐客而復止眷  
茲地以擇勝兮將誰為之肇始壓鋒鏑之餘腥兮煥丹  
堊於蒿艾惟因名以見意兮識若人之有在吾聞哲人  
之憂樂兮蓋視民而後先匪土木之惟尚兮庶逋播之  
少安使輦呻之一有兮吾將食而不下咽招父老以前

進芳潔予尊而使飲凜德星於虛危兮固爾曹之深幸  
屹琅瑯之千仞兮與茲樓而相望雖歲月之逾邁兮爾  
思侯兮勿忘

古律詩

次韻陳可復見贈

自甲戌始

二年窮谷斲黃精兩見騷人賦落英萬事吾今負初願  
百年君亦厭虛名花開花落春還夏窓暗窓明雨又晴  
莫讀離騷但飲酒從來前輩戒秋聲



贈蕭光祖

之子固絕俗少年甘寂寥田園一蚊睫書卷百牛腰雪  
徑晴猶凍烟江晚不潮箇中勤著語老耳欲聞韶

哭楊虞臣丈

先君捐館時親舊止四五丁寧奉遺訓我沒誰撫汝孤  
生卧苦塊泣血誦此語楊公十年舊不見五年許兩萍  
忽相遇握手涕如雨高懷幾骨肉老語傾肺腑生死見  
交情公固不愧古嗚呼英銳氣又掩泉下土我行田野

間陳迹時一覩尚餘舊題壁猶有所畦圃二兒吾未識  
必有稱家主寡寡先友記文缺久不補渠如能綴緝吾  
敢憚覲縷但得行實完雖遲不猶愈

贈蕭希仁

希仁精臨川之學

鍾山昔游眺蒼翠莫峻嶒不覩騎鯨像空瞻下馬陵斯  
文今墮地夫子獨傳燈剝欲摳衣問嗟予病未能

又

趙子老巖壑壯心輕世儒曾無一湔袂但看百喑鳴已

作山頭雀誰憐屋上烏知公主清議試與一噓枯

寄日新

楚水茫茫覩面難燕鴻冉冉寄書還自知荒澤誰為雨  
却怪孤雲未出山

病起次韻子和

不盡揚雄一鵠酒却吟平子四愁詩酒能作病終何益  
詩解窮人亦漫為便死正應如土偶縱貧那可恨毛錐  
如今只有荆卿在能記田光少壯時

別閭丘諸公之臨安

久耽筆硯棄犁鋤石友申申或罵予涉世何殊枕中夢  
誤人今信案頭書不堪秋菊彫荒徑欲趁春帆返敝廬  
回首交游幸無辱蒯緱雖短不彈魚

別仲時五首

江山共清煥魚鳥亦蕭散歸與三畝園趁此秋未晚  
當年丘壑心皎皎秋夜月那知蹭蹬間秋風彫壯髮  
童烏已黃土其奈太玄何尚喜熊兒在能為田父歌

窓隙風微度簷頭月半歌當君感秋日是我到家時  
窮愁好著書到此已絕筆十年意外謗庶可弭萬一

哭畋

久識死為滅正緣情未忘宿因吾已斷惡債爾先償臨  
老翻如衍平生錯笑商莫風吹雨至老淚併淋浪

偶成六言

筠簟欹眠露夜蒲團趺坐花時莫歎老驥千里且喜鷦  
鷯一枝

贈宋公佐

前人久零落我亦老東南  
閱士幾千百如君止二三  
歸耕持長策祛病憶玄談  
何日相隨去誅茆共製菴

鬢髮傷今白艱難憶昨經  
君猶厠跛鼃我合棄流螢  
老樹秋淒瑟寒風晝窈冥  
山房半酣坐差勝楚人醒

送宋元輔

駸駸鬚鬢蒼冉冉歲月換  
良田未易求蠹簡不喜看  
君兮何為者冠佩立憲憲  
苦來湔祓我丹繪施朽炭  
深慚

鴻鵠姿肯作荆雞伴我窮豈中郎君才實元歎相從琢  
磨地枯几媿塵案尺書中夜至索去不少緩扁舟下東  
南春水綠平岸遙知醉吟處詞翰兩璀璨悲懽難一揆  
欲別先自斷寄我子夜歌酬君秋雨歎

公佐座上分韻得樓字

誰謂子青眼不嫌余白頭共穿康樂屐來醉仲宣樓風  
定江猶怒雲高雨欲休西山多爽氣吾忍賦悲秋

歲莫不樂

銅鉗烏几伴棲遲無復風流似舊時  
病憶老親空嚙指  
貧逢兒輩亦低眉  
世塗何異兩蝸角  
士價今輕五穀皮  
滿眼雲山不歸去  
問誰縛汝竟無辭

次前韻呈公佐仲賢

世態休論點與癡  
賓鴻社燕各隨時  
稍令有地堪容膝  
可復從人再炙眉  
不憤寒梅呈素面  
自憐老檜剝蒼皮  
年來懷抱已如此  
歸對交游有愧辭

蠹齋鉛刀編卷一



欽定四庫全書

蠹齋鉛刀編卷二

宋 周孚 撰

古律詩

次韻洪致遠春日絕句二首

石友今年斷不來  
紛紛沒馬但黃埃  
自憐老臂今三折  
安得愁腸不九迴

卧病塵尊久不開  
知君新棹酒船回  
似嫌白髮非春事  
不向東風遣信來

送張子和之金陵

轉蓬相遇紫髯城老眼昏昏喜再明與世多違真俗債  
於身無益是虛名試將休歇償前境莫把文章眩後生  
若相鍾山有閑地早令秋雁與傳聲

送仲時赴銓試

桑梓與君舊來南更同州雖云漂泊地墜好敢不修蕭  
條霸陵飲寂寞斜川遊相從能幾何歲月僅一周未竟  
室中語已促江上舟舟行不宜冬烈風無時休非不欲

挽君恐鬱活國謀情農不自安乃亦歲有秋力田苟逢  
年一畝千鍾收富貴今其時君行勿夷猶

公佐索詩次別仲時小詩韻遺之五首

蘭焚以其香樗壽以其散萬物無不然愧我知之晚  
莫競夢中鹿且視指端月儻能心地明萬事一毫髮  
朱絲徽黃金問子用此何從來履霜操不及懊儂歌  
今年苦風雨老屋半傾欹投足猶無地君來正此時  
欲書歸田具請子試濡筆先之蠟屐雙侑以藜杖一

洪致遠屢來問詩作長句遺之

君不見伯倫平生老閉關祇有一頌留人間懷鉛抱槧  
亦何益惠子五車終不傳我今所見蓋如此堆案文書  
藏鼠矢自知老境要灰心却笑少時空血指勞君日日  
來徵詩試欲把筆心自疑無鹽已老稍識恥安敢唐突  
西施為古人作詩有成法句欲圓轉字欲活始循規矩  
後變化如以金丹蛻凡骨君試停杯叅此語莫笑前人  
用心苦祇今孰是前輩詩風漪作文君看取

哭柳仲和

千時雙落莫觸事兩趑趄  
意廣子知我命窮天喪予哀  
音來澗壑老淚溼衿裾  
從此南岡下經年獨荷鋤

答閻丘仲時見寄

纖纖輕草不勝鋤  
忽有新詩來起予  
十載光陰消蠹簡  
兩家生計共蝸廬  
久知吾子傳真訣  
試與衰翁辯賈書  
何日一筇真過我  
共炊香稻擷園蔬

贈致遠

起躡寒溪雨來嘗老屋茶論年我蒲柳沙世子龍蛇嫩  
綠初還水嬌紅半著花澆春可無酒試與問西家

世正矜投筆人誰話濯纓君窮猶鬼瞰我病亦天黥古  
寺雲埋徑官濠柳暗城便應從此去已負白鷗盟

小柳志超逸病毛才崛奇俱為一杯土但有百篇詩漠  
漠江山靜忽忽歲月移黃塵沒馬首賴子一伸眉

畋也頗豐下本期渠克家才令配晨月又復摘秋瓜寒  
泊堪秧稻荒池足漚麻熊兒幸無恙聊伴老生涯

留別致遠

隄邊楊柳發新枝歎息春工又一時對景不為千日醉  
語離還賦四愁詩窮途至此空回首老色如今各到絲  
粗有一廛歸去好犁鉏何地不相宜

宿崇福庵顯上人房

潦收秋澗靜木落莫山稠石路果能滑杖藜聊此留夜  
房憎豹脚朝飯憶貓頭為語湯從事無忘馬少游

同伯庸游甘露有感次仲賢韻二首

故人同我去清旦杖崇岡寒日無留照鷺鴻有斷行聊  
將一日欸少洗十年忙衰病不相棄我廬今未荒

縱談四壁靜宴坐一鈴鳴老火漸消晝寒窓忽報晴淒  
涼魯兩士赫奕漢三明俱作南柯夢令人骨亦驚

口占贈致遠

柳絮翩翩燕子飛小園風物揔宜詩今年已解穰侯印  
輸與三生杜牧之

次韻仲時春莫懷歸



奕奕新詩飽琢磨精靈如此竟誰過共聽鷓鴣春將老  
舊記驪駒子試歌坐病已孤新歲酒忍窮思種故山禾  
祇今石鼓文多缺誰為銓量掘白科

次韻安民

肺病侵陵倦出游寒窓槩几即菟裘百年忽忽從渠轉  
萬事昏昏只麼休學道幾人能杜口趨功誰子不焦頭  
留君試話人間事翠竹黃花最耐秋

贈宋安民

閒階塵沒屨隙戶風翻裳歌傾數椽屋易知獨難忘為  
此室中人久薰知己香蘭彫潘洪逝壁碎韓呂亡非渠  
妙語言何以浣我腸蒲團兩默坐寒窓墮斜陽我炙彼  
能嗜歎息時拊牀緬思爭奪境其險劇太行病馬已虺  
隤三徑可忍荒相期荷鋤歸歲晏天欲霜

夜坐偶作

霜風振枯條掩戶日已夕老屐不出游畏此寒慄慄挑  
燈對空爐蟲聲喧四壁翻書娛兩眸渺渺玄霧隔爬搔

餘倦醒城鼓聽歷歷奴木上坐相對成二客殷勤謝  
爾曹伴我此岑寂干時悔前猛學道飽新得請看警露  
鶴何似遇風鷗懷情鬱不語簷月已半仄

巫主簿挽詞

正歎淹黃綬俄驚啟素車生真元亮似老更伯喈如誰  
哭三年墓空傳萬卷書蜚螻可無念身世本蘧廬

贈陳道人

正諦危欲斷誰膠能續絃要為師子吼莫看野狐禪小

住真聊爾相逢獨歸然同床有佳夢或許老夫圓

次韻贈林義之

炎暑不可觸相逢正此時初無一日雅肯誦十年詩語  
際傾心劇忙中識面遲幽貞可潛伏君智固如龜

我已劉楨病君仍屈子醒俱為石碌碌不改柏青青吉  
語時占鵲窮途恥聚螢何時一杯酒相對話飄零

贈朱德裕

老弃泮宮籍日與學子踈英英佳公子乃肯過我廬觸

熟生積疴子意何勤渠逐臭海夫癖不幸今子如惜無  
一尊酒冰瓜配園蔬持家今十年但有數冊書斯文等  
圭璧後生多璫璣我田失耕耘政欲賴子鋤晚雨溼不  
借新涼到遽蔭勿嗔折柬邀衰年出無與

高冠及雲霓修佩綴蘭茝潘洪已鬼錄尚喜之子在平  
生詩作魔見子始追悔奕奕清圓句極力有不逮政緣  
一飯先厚禮辱始隗莫年專一壑謗語溢四海逢人欲  
話子恐子重得罪古學寒如灰到此已千載非無力學

士始勵終則怠子兮其勉旃河清寧可待

戲洪致遠

不妨一斛貯檳榔玉詵詵已雁行可是譽兒元有癖  
未應辟穀獨無方玉川此際貧雖甚稠錫他年債已償  
世事乘除君記取擊鮮從古是諸郎

次韻龔良臣見贈

楚國兩名士鶴居雞鶩羣有誰沾賸馥獨子嗣清芬到  
睡唯黃妳扶衰祇紫君猶勝馳宦子揮汗讀移文



蠡齋鉛刀編卷二



欽定四庫全書

蠹齋鉛刀編卷三

宋 周孚 撰

古律詩

與高伯庸同游王氏墳庵歸而閭丘仲時詩至

因次韻貽顯庵主以紀一時事二首

寂寞城西寺重來已素秋  
未霜芳草合欲雨暮雲稠  
濁酒羸方戒新詩困復休  
翩然會心處煙徑有歸牛

法水堪前垢僧爐自淬塵  
飯炊雲子熟茶泛乳花勻  
草

草情何厚忽忽迹易陳他年輞川上為畫兩綸巾

贈龔良臣并柬雙融趙居士

平生四海龔夫子昔日窮愁今尚爾車如雞棲馬如狗  
笑指塵編作知己羣兒不識老彌明一語落紙慚且驚  
森森老幹蒼檜聳寥寥雅奏黃鍾鳴萬牛不來羞自獻  
正與古人同此歎霜髯雪鬢可奈何但願窮年常飽飯  
北風凜凜冬欲殘日莫更復衣裳單黃金如粟趙居士  
儻有綈袍遮此寒

送趙師孟

乃翁墓木已秋聲喜向諸郎識老成舞拙固應緣短袖  
詩高或許是長城莫驚濁世還分袂聞有清淮可濯纓  
歲計不贏親已老肯因腰直厭逢迎

高仲威揔管挽詞二首

今年歲在己公果開佳城竟不登三事誰能作九京羣  
公謾推轂故客獨沾纓遺德憑誰紀平生不近名

憶在多艱日君王歎鼓輦來從三晉遠獨與二高齊佳

賦方驚鵬流年已夢雞生前橫槊手還傍漢征西

次韻朱德裕見贈時予病初起

蓋世功名泰一炊驚心歲月較雙馳五漿先饋那須爾  
二豎相凌少避之種種鬢毛吾欲老翩翩書札子能奇  
黃花無語秋將暮莫惜玄談與解頤

病中柬課會諸友二首

橘綠橙黃歲已秋踈籬戢戢上牽牛無方可已憤懣疾  
屬子一來開此愁

寒蟬唧唧報更遲秀目踈眉費夢思  
須信愈風元是檄可能祛瘡不因詩

良臣和前韻見貽復次韻二首

蒲團枯几度春秋自笑沐猴騎土牛  
奇病撩人仍止酒問君何計可攻愁

久將農圃學樊遲欲賦三都愧左思  
尚喜彭城漢夫子肯加滌袂與新詩

時予夏課復未成

九日風雨謾興

嘗聞老潘句今日復題詩積潦朝猶淺歸雲曉更遲斷  
無桃葉唱數負菊花期日莫還孤坐寒燈頗見知

即事次杜牧之韻

關

龔良臣知狀二首

不向辛夷樹下行老來無意賦閒情可能尚似韓夫子  
猶有兒曹識姓名

昔時鄴下劉公幹今日周南太史公兩鬢似霜鬚似戟  
不應孤負北窓風

郊行

江北江南歲已霜  
老筇無伴自徜徉  
冥冥小雨朝猶劇  
寂寂殘花晚更香  
自古隙駒如歲月  
只今芻狗是文章  
虛名滿世知何益  
付與羣兒自較量

即事二首

漠漠冥冥氛祲多人間  
何地可婆娑窮途正苦身  
為累老境仍嫌病作魔  
此日蒼生望安石  
向時老將憶廉頗  
周宣漢武規摹在  
誰為君王賦伐柯

瞿瞿長空蔽夕雲杖藜徙倚莫江濱孤城風土偏愁客  
別岸煙埃欲污人謾說一言能悟漢久疑三戶解亡秦  
風餐雪虐鑿輿地湖海無能泣病臣

寄閻丘仲時十一月二十八日

曩哦佛狸謠別我江上宅不憂道里遠但恐生死隔忽  
忽分袂去悲風動悽惻寄聲來問我何忍試鋒鏑憔悴  
山澤間藜苒尚可食寒螿戀餘涎欲去我未得作書思  
報子霜雁正戢翼邇來聞吉語草木有佳色驚雷斃梟



猗甘雨厭螟蟥崎嶇各不死仰荷天地德平生長卿舍  
依舊立四壁君歸亦莫緩歲晚霜露逼相期津上亭漚  
酒酹餘厄

次龔良臣韻有感予嘗言一事而驗

君家月旦擅新評尚復常談記老生可但龍蝦元異族  
不妨箕斗是虛名孤懷曩日誰能會危語今年子不驚  
更欲為渠傾底裏曉風澁雨未全晴

寄陳道人

瘦筇盤礴越江邊笑我孤燈照夜禪當日期穿水牯鼻  
莫年猶着野狐涎忙中弦望驚三易聖處階庭讓一先  
曾約芒屨踐雲雨快來相見已新年

謝時卿見過作此謝之并簡德瞻二首

索寞干戈際交游不棄遺君真斲鼻手我愧折肱醫未  
學窮何用虛名老不宜寒窓但塵橐難療十年飢  
余髮已種種子來真枉生深勤兩鳧集何止一牛鳴晚  
徑泥猶滑春江岸欲平論詩方有味為我老彌明

兵定後寄仲時

憶昨傳丹詔寒盟罪黜奴分攻自西蜀指日會東都聖  
慮雖天合臣材與古殊居安空矍鑠臨難竟侏儒騎病  
嘶枯枿兵寒隱敗郭積尸朝嘯鵬遺廩夜栖烏漢水空  
滋楚淮山不救吳四方俱梟元一死在須臾避地憐之  
子傳聲喚病夫攝衣俱邂逅攬轡復踟躕疾動羸方甚  
寒凌喘未蘇淒涼一抔土牢落十年雛生計哀難捨交  
情愧不渝深勞魚煦沫甘作鳥棲枯咄咄形容變駸駸歲

月徂嘗疑冒頓惡未受郅支誅神武俄潛運明徵果不  
誣六龍才蹀躞羣鼠已睢盱蠱尾興談次旋頭落坐隅  
造謀由肘腋償禍見頭顱佳氣監空極妖氛掃地無微  
生脫紂擾一笑起疲驚喜極翻搔首狂深屢挽鬚飄流  
免僮僕團聚對妻孥敗簡欣重緝顏垣得再圻殘年貸  
蒲柳餘慶望桑榆短艇來何晚明窓晝可娛作詩嘲懶  
慢喚酒濯艱虞我病猶能此君行莫厭迂相思倚江閣  
寒雁下平蕪

夜坐有懷

衝風凜欲冰積雪寒未掃春光來何遲雙鬢倏已老悲  
吟北窓下孤坐對參昴不覺釜生魚漫謂詩可飽平生  
賞音人團聚苦不早陳翁氣金玉蔡子文斧藻倉皇一  
駭散各適千里道悠悠殘歲月忽忽老懷抱道腴雖自  
味俗况固難好無疑趙居士欲剡佛殿草

元日懷陳道人并憶焦山舊遊二首

故人應白髮令我尚華顛舊約鷗能記新詩雁不傳功

名畫地餅歲月下江船回首題詩處淒涼已去年  
昨偕趙居士同宿贊公房樹暗朝疑雨山寒夜得霜經  
營煉丹地拂拭坐禪床忽忽紅塵裏深慚鉢飯香

贈朱德裕宋安民以學詩如學仙為韻五首

大儒夔蹠蹕小儒鶴俛啄二子雖楚產獨不困俗學我  
見三歎息渭清湮自濁祝君但默坐嶽嶽須折角

材俊千里駒學問五摠龜前輩為青眼多士推白眉屬  
我病作祟濁醪不同持山林有成約捧盃盟此詩

卒卒不會面死生兩蟾蜍相望一牛鳴可忍自作踈漚  
酒不醉我徵詩又遺予膠漆自為堅愧我今不如  
孰知詩窮人而我乃妄學殷勤平生友饋我破痼藥百  
年燈落燼萬事風隕雹誰能強自苦清坐亦差樂  
佐飯止三韭庇身唯尺椽永絕富貴想薄有香火緣尚  
憂貪嗔癡更著後者鞭定傾與援溺稽首西方仙

懷焦山園禪師贈趙居士

鍾山一馬駒蹀躞九軌路才高難為兄質妙不愧父頃

嘗造其室握手宛如故孤燈留我語碧眼照窓戶寒珠  
湛塵源朝日破昏霧相期白蓮社此意何可負當時座  
間客子亦同此趣忽忽不再見忽復歲云莫衝風戰夜  
窓山氣想凝洹扁舟欲問訊恐觸蛟鰐怒吾儕晚聞道  
歲月忍虛度聲名身外鷁文采性中蠹當求一轉語共  
證十載誤春江兩溪平偕子稽首去

促趙彥章山行

傳聲趙居士勝踐不應遲舊約梅開日俄經麥秀時殘



花猶可醉小雨尚能詩莫作京塵客空成了事癡

蠹齋鉛刀編卷三

欽定四庫全書

蠹齋鉛刀編卷四

宋 周孚 撰

古律詩

再到焦山示度書記

雪埋斷麓元曾到  
風度疎櫺始再來  
春盡幽園尚紅藥  
雨餘荒徑自蒼苔  
短筇扶病吾猶力  
古錦囊詩子合開  
第恐平生老無著  
不能縛律似宗雷

送陳道人之金陵

一筇歷遍海邊山每見鐘魚便破顏瘦柏形骸雖已老  
斷雲蹤跡本來閒向來危死干戈際此去相望夢寐間  
十載光陰已虛度欲加訶斥待君還

題蘇庭藻竹堂

三生石上老徽之水竹風流自一時春砌陰陰翻敗籜  
夜窓寂寂戰寒枝已專嵇阮生前境尚記羊何別後詩  
開徑相從定何日即今已恨十年遲

次韻度上人窓下竹

漫漫疑爭地踈踈巧避牆少紆黃落恨聊貸白間涼秀  
色浸朝几寒聲到夜牀何須渭川口玉立萬夫長

讀佛書

迷途誰解反三隅半是騎驢更覓驢一瀉未逢師子吼  
千章虛讀野狐書

送日新之池州即席時蘇庭藻行方一日庭藻  
所居名竹堂而梅室日新自號也日新求予  
舊詩事冗未暇寫

衰老何蕭索親朋半別離未終梅室語已賦竹堂詩惡  
況吾方劇來書子勿遲寒藤縮蛇蚓相記待他時

贈宋安民失解

寒林經雨葉全彫莫向茅齋怨寂寥小杜科名縱濡滯  
老元詩律尚嫖姚窮營敗屋堪容膝病策寒藤勝折腰  
紬史翻經有成約不應從此厭招邀

朱德裕隱軒

十年仲蔚蓬蒿宅老屐今朝到此間驚怪名駒甘伏櫪

坐令倦鳥苦思山嬋娟未嫁猶遭妬矍鑠雖侯可勝閒  
一首陶公舊詩賦要須健筆挽令還

十月卽事呈彥章

衰病今年劇陰寒此際頻煙溪長作暝霜葉不成春北  
貢來何緩西師信未真平生繞朝策吾亦愧斯人  
須髮五分白相看倍愴然死吾元有命窮子定非天蓬  
轉甘今日絲懸憶去年遙憐清夜夢亦墮白鷗邊

哭高伯庸

晚雨澤叢艾驚風倒枯松蒼蒼固無神此語疑可從十  
年江南岸與君每從容披翻俱敗簡登眺同老筇平生  
毀譽半意子陳元龍方期萬里行忽與二豎逢哀音憶  
初聞一慟幾摧胸歲月逝不留炎曦已成冬惟昔在世  
日最厚寵與龔國材良臣聯翩奇禍作摧此西峙峯淒然荷  
鋤地誰復伴老慵稚兒亦可憐見我猶能恭勿說山巨  
源吾今愧渠儂

歲莫有懷存沒次舊韻東德裕安民



歲莫忽不樂哦詩憶同裳百憂從中來孰謂酒可忘昔  
我二三友芳蘭閨孤香悠悠十載間屈指略喪亡寒花  
欲誰遺悵然結中腸二子後來秀雙鳳鳴朝陽胡不相  
暖熱矧我病在床只應鵬與鷗飛舞不並行春圃可擷  
秀晚陂可壑荒會將兩芒屨同踐林下霜

寄蘇庭藻二首

蘇子文章舊起予英英寒玉琢冰壺十年不見空青眼  
一日相逢各白鬚可是封侯須望尉只今著論又潛夫

青燈寂寞秋堂夜歎息寒衾夢亦無

雙井原頭秋草合  
峨眉山下暮煙深  
看人競改元和格  
期子重賡正始音  
高論與時終落落  
新詩過我太駸駸  
著鞭一語君須記  
世事由來畏有心

喜日新至

衝風衝雨何時了  
忽忽歸來歲又冬  
老弟世緣真嚼蠟  
病兄術業亦屠龍  
寒燈眩目何妨暗  
濁酒澆胸莫厭濃  
龐子高郎已蕪沒  
兩窮相對且從容

次崔端甫韻席上

寒窓一再雨幽徑兩三花老境吾猶健春筵此最佳清  
尊泛寒蟻醉墨落栖鴉笑語崔夫子相逢即是家

贈游元著

老去塵冠恥再彈只將尊酒對青山已忘穴蟻三生夢  
長伴江鷗一味閒止許傍城開竹徑會容扶策叩柴關  
平生月旦鄉評在著我諸晁伯仲間

元著予鄉人也  
故有諸晁之語

代人張撫幹母挽辭

自愧升堂舊鄉閭復外姻那知伏枕日正值輟春辰  
怗方長夜蘋蘩忍獨春誰傳絳帳學季子本天麟

龔良臣無恙日手抄珪粹中詩數十篇見遺良

臣既沒於書篋中見之愴然有感因次珪卒

章韻以寓哀

老屋惜惜晝掩門清才妙質苦思君屠龍每歎平生學  
下馬誰尋此日墳痛惜黃壚埋玉樹憶曾玄鶴困雞羣  
西華牢落今安否見說居猶不改薰

次間字韻送德裕太學試

人如景德咸平際文到貞元大歷間  
種樹有誰甘避世著書喜子未藏山  
自憐斥鷃空溟海須信名駒合帝閑  
十載天荒誰與破政須力奪錦標還

次崔隱叟韻贈端甫

與子相從自小年孰知術業是家傳  
胸中雄略堪推轂筆下新詩近著鞭  
共歎飄蓬真命爾相看樗散却天然  
紫萸黃菊何時辦要拍洪崖醉後肩

清明日余與諸友游招隱山寺酌酒宋氏園亭

謁蘇才翁墓而歸

小雨冥冥欲作泥  
晨光不負老人期  
綠陰蒼蘚初分坐  
白石清泉共賦詩  
酌醴焚魚謾今日  
賣刀買犢定何時  
傷心紫閣飛揚老  
千載茫茫只斷碑

觸目六言二首

正似丹溪溪上祇  
欠八愚老翁陂外  
紫青繚白風前駭  
綠紛紅

陂空鳬鷺何在寺古鍾魚或無山氣陰陰欲雨僕姑端  
解欺予

朱德裕以言念君子為韻賦詩見寄次韻答之

四首

昔別柳未花濃綠令映門日月不吾淹盜驪更驚奔佳  
人渺天末有志誰與言床頭覓塵編遮此老眼昏

句曲一老翁早歲困鉛槧整冠纓為絕晚境尤可念聞  
君從之游琢磨去瑕玷何時雷夫子斲此兩龍劍

屬顧  
文應

文

奏金蟋蟀間子亦有異聞引吭與相和愧我言不文交  
情諒石友風味真麴君可無一盃水與我湔垢氛

奪薰以其猶敗素以其熟古來辟世士政復門掃軌君  
看草玄翁肯邇夸毗子芳蘭生深林如此乃士耳

焦山度書記以詩見寄因次韻

突兀蒼崖百丈餘憶曾隨處小躊躇江非灝瀕吾何畏  
山似楞伽子合居當日勝遊同轉轂邇來清境屬春鉏



友郎不念平生友華髮刀騷已映梳

蠹齋鉛刀編卷四

欽定四庫全書

蠹齋鉛刀編卷五

宋 周孚 撰

古律詩

勉洪致遠龔良臣與致遠善時已亡

人生多憂虞此語傳自古詩書不賙飢士亦倍齟齬憶  
子少年時落筆敏風雨自言名家駒朝翼夕秣楚那知  
十載後敗甑不炊午括囊經濟策鬱鬱卧環堵呻吟誰  
與伴壞壁響飢鼠長松要霜雪念子果如許窮通何必

較人世幾寒暑生前十駟馬身後一丘土那知五君詠  
老魄棄大數安得彭城生從旁證吾語

次德裕餉人參韻

參墟有神草飽歷雪霜寒黃鵠何緣致玄珠欲報難仍  
煩一藜杖來對兩蒲團卧病干戈裏勞君為控搏

雨自四月至七月暑熱不能堪作此寄德裕安  
民二首

一牛鳴地無多遠襌襪經過恐不宜風雨蕭蕭自蠶月

光陰忽忽又瓜時。緬懷勝踐真成夢。尚喜窮居不廢詩。  
肯赴涼秋通夕約。短絝儲粟為君炊。

纔晴便有蒸炊厄。未雨先懷重脰憂。豈為形骸悲莫景。  
政因風土憶中州。雷麋老木誰能賦。鷲墮空江始欲愁。  
解洗新亭邇來恨。清談還待賈長頭。

次戴教授題德裕隱軒韻二首

一室閑清畫妙年。人所難知心有黃姑覲面只蒼官。且  
喜龐公健誰憐。范叔寒升沈有流轉。吾亦夢槐安。

歎息朱夫子新詩手自編正應前輩似不厭老夫看駕  
馬難言駕修塗更贈鞭風聲與富貴他日定雙全

莫秋贈端甫

長年無好懷一病動辰浹淒然清鏡中衰鬢不勝鐫自  
憐鬼見笑甘受天所厭坐令金石友散作霜後葉崔郎  
雕龍裔翩翩古游俠不忘平生言經過頗稠疊憶昨賦  
新詩賈孟困凌躡情高破天慳語妙出月脅老秋餘幾  
日叢菊抱寒蝶何時跼然來一笑起衰薊寒醅對梨棗

不惜倒箱笈但恐食無魚令君反彈缺

次韻朱德裕讀豫章詩

黔安老居士平日謾為官梁壞哀何補韶亡續更難真  
為漢玄歎寧作楚纍看會買舉比去蘄無負此冠

事見集中

冬日予與六人者游焦山謁園禪師訪瘞鶴銘

斷碑及焦公丹臺愴然有懷兼柬朱陳二友

陳方病目而朱校易未畢

平生紈綺場寧食三年艾江山豈宿緣老去尚餘愛茲

晨幸休暇共步青蓮界風漪湛如熨霜葉紅可畫道人  
喜客至斐几共清話從容得一飽老闕

起遵岩

下路芒屨濯湍瀨摩挲華陽碑一讀一感慨高名竟誰  
氏陵谷已遷壞緬懷九轉丹吾老庸可待陳翁熬六藥  
朱郎研八卦雖云竹林集尚欠二子在發春吾將邀負  
約幸無再

讀呂居仁詩有味其言因錄致德裕隱軒中且  
次其韻余嘗有蒼烟窮谷之約於德裕故未



章及之

瓠落不解器骯髒無緣官朱郎抱此恨終歲常鮮歡家  
書破萬卷生計才一簞積憂苦熏心獨以詩自寬清於  
蟲鳴秋淡若雲出山老眼久無人一見為解顏菰蒲葭  
葦中英才得任安向來三日歎共此一室間人事每乖  
悞比復會面難駸駸爭奪徒臨淵涉危湍日月老鬚鬢  
百挽不一還那知箕潁波可以濯肺肝我形已支離乃  
學仍汗漫會營南山廬相與同歲寒

追次米元章游焦山韻寄度上人

一別幾晦朔向締今復裏相思未能往四序忽已周  
緬惟君所廬蒼波繞孤洲枯筇支老病嘗得一再遊  
風軒納飛鳥煙涯辨歸牛舊游固在茲慘慘增離憂  
劇思脫塵累去作十日留枯桑號寒風斷岸維敗舟  
騎衡古有戒誰復知我愁遙瞻經行處寒山卧蒼虬  
惟子妙詞章出語鯁不柔向來畫澈輩許子參其流  
江山固自佳況復更平聲凜秋玉唾疊箱簾以暗未肯投  
不應結綠價敢

以燕石讎封題定何時思子令白頭

次韻彥章雪中見寄二絕句兼柬陳道人

戛戛寒風襲敝裘積蘇宮觀恍神遊  
要尋仙客攀琪樹更倩王孫記玉樓

老耕南郭一畦田飽食安眠久愧天  
更與殷勤厭螟螣一冬三白記今年

用獨樂園故事以雪水烹茶招彥章

西都舊事君須記東顧新詩我未能  
來伴支筇眺斜日

晚山相對玉峻嶒

呂城與蘇庭藻飲

俗物敗人意子來真醒心陸沉何用歎白墮不妨深老去慙連璧情親記斷金歸途更清絕天迴月低林

雪夜懷德裕

惛惛病骨冷難勝未覺山陰興可乘度雁寒窓空有影戰風老木定生冰瑤林琪樹憑誰賦縞帶銀盃說可徵半臂騎驢今健否夜堂孤坐對青燈

得蘇四庭藻書

十年卧病江湖上今日蘇郎解寄書  
末路何人肯憐客窮途惟子獨知余  
蒼苔紅葉詩應好紫燕黃鸝夏正初  
耆舊彫零無可語差彊人意正思渠

嘉甫有西園之約病未能往

風流王武子一見一番新處世誠名士  
於余復外姻追尋元自熟招喚不須頻  
孤負名園興衰年實厭春

懷日新

芳草綠如積阿連殊未回空令掃門待不見寄書來乳  
燕時能舞殘花尚或開老盆當貯酒忍遣復塵埃

奉寄西園主人

幽園不到已經時尚記山翁倒接離老柳吹綿渾似夢  
斷雲閣雨政關詩自憐藥裏方療我試問棋枰欲對誰  
聞道春風木芍藥斷畦猶有翦殘枝

王嘉甫許借清賞堂讀書

卜居厭近市臨老心亦煩目眩車馬塵耳聾歌吹喧朝

旗與莫柝沉復戎旅屯養痾定何所城南有名園槐柳  
森欲合桃李榮以繁芳塘艷積雨踈牖明朝暎豈惟蘇  
病眼亦可清吟魂主人魏霍家列戟藩朱門馬埒編金  
錢豪習令尚存乃能容此老厚意可得言十年客此邦  
要以桑梓論隔牆竟罵全奉卮孰留髡今日復何日媿  
此地主恩他年贊易室憑君記虞翻

時予方  
欲學易

調官畢寄蘇四

十年卧江漢一旦別衡茆聖澤霑膚寸微材愧斗筭明

廷看丹鳳幽壑憶神蛟弱歲虛游渙今年彊戰殽當渠  
觸鋒矢賴子續絃膠膏馥雖資甫酸寒未改郊簡書行  
自縛松桂不勝嘲豈止慙聲叟尤深笑石交名駒猶伏  
握病鶴反離巢歎息幽貞吉吾令負此爻

贈智菴上人

寂寂霜林噪暮鴉萍蓬相遇各天涯石翁舊話誰能會  
鍾阜親孫子最佳老境歸根真落葉新詩蛻骨定靈砂  
相期絕學捐書去病眼今年我亦花



題朱德裕詩卷後丁元暉攜來

斯文久寒盟袖手空歲月緬懷建安初絕歎永嘉未逢  
君雲陽城尚得慰飢渴袖中百篇詩與世殊軌轍不補  
義山亡可續浪仙絕此言吾敢妄老臂常九折向來雖  
數見邇者間何闊髯丁亦吾黨十載猶裋褐賡酬得佳  
句渠寔君則跋窮途鬻滯貨寒餓何自脫信知丘壑願  
不受軒冕奪吾聞十五都正以荆璧割士價五羖皮未  
售已白髮大明輝中天節屋未有察君其混龍鰕吾亦

老獷獺

郊行懷日新時得書而余病方愈二首

水凍全收綠山寒不解青崎嶇賴藜杖憩息得丘亭問  
歲方鷓鴣懷人更春令雪崖差可眺風樹不堪聽

衰獺何人記當家子最賢手書憐我老肺病為渠痊得  
句煩歸雁傾盃約莫蟬塵埃老雙鬢相見定疑年


病足王嘉甫見過

此身真是一長亭却笑渠儂說養生高枕從今謝奔走

短筇元自厭逢迎  
羸骸爵躍渾無日  
老語蟬聯倍有情  
須信江州史君在  
肯從籃輦見淵明

呈伯永

陳稻那能白寒爐  
或似紅雲低將作  
雨樹老不禁風流  
落身俱客推顏鬢  
已翁相看一杯酒  
老子不書空



靈齋鉛刀編卷五

欽定四庫全書

集部

蠹齋鉛刀編卷六至十二

詳校官庶吉士臣吳烜

主事<sub>臣</sub>呂雲棟覆勘

總校官進士臣繆琪

校對官中書臣李斯咏

謄錄監生臣劉清問

欽定四庫全書

蠹齋鉛刀編卷六

宋 周孚 撰

古律詩

足病未愈

舊歲元無幾餘殃尚復留從誰縮地脉空自怨天囚未  
有飛鳧便深懷得馬憂殷勤木上坐與結百年游

次韻寄日新

南去關河雪正深尚煩歸雁與傳音  
泫泫逝水經新歲

落落寒松只舊心  
別後漢陂誰與賦  
老來梁父不須吟  
毀車殺馬吾何敢  
抱甕相從老漢陰

與一二親舊小飲有懷日新次其所寄詩韻寄之

寒衣襲夏絺  
夕飯薦秋菊  
吾家邑中黔  
標致頗投俗  
挽渠萬牛難  
得子一變足  
向來山林盟  
相信不待卜  
那知語離處  
老樹已重綠  
忽忽一樽酒  
難黍招近屬  
杯行子何在  
小雨暗崖谷  
富貴朝露晞  
歲月流電速  
懷哉十日

飲傷此千里目徘徊黃金花采采不盈掬

德裕見過次舊所題隱軒韻謝之

一龍一蛇玩世人三沐三薰保家子平時面交渠所憎  
此日足音吾為喜高標朔雪凜松檜妙句春波泛蘋芷  
共驚騏驎甘伏櫪誰言牆施羞倚市袖中漫刺不復惜  
自笑衰翁安致此窮途相從蕙增歎老語未盡壘先恥  
要令清明遍奴隸勿使光芒離泥滓一杯屬子須勉旃  
愛莫助之吾老矣



二月即事自後丁亥始

窮閭無邸報病耳信塗傳黃鵠來嚴道朱羅化羽淵秋  
雲那殺日夏潦漫稽天歎息韋劉輩牽連亦外遷

贈耿介邦石

經年旅食厭菖蔓雪後征衣亦自單憶子最憐三虎怒  
愛渠欲挽萬牛難向來老筆那容棄此去塵冠尚可彈  
敗絮不溫吾自爾一枯濁酒禦春寒

哭智菴上人

石翁山邊初見子僧寶遺珠無乃是當年不負澄觀詩  
晚歲還供玉川米河潤九里人所傳我窮累渠令溘然  
秋風宿草荒墓田再來阿練吾無緣

以蠻菩提數珠送王嘉甫

得自海南天修來治歷年聊為佛陀供豈上燄摩緣俗  
垢元無染心珠要自圓他年如許壽不負趙州禪

寒食日與郭積之郊行飲中懷日新時春寒甚

二首

江縣明寒食書齋老禿翁衰懷元自異勝踐偶然同渚  
柳絲絲綠山桃樹樹紅阿連不在眼愁滿夕陽中

貂狐猶夙債餽粥有佳招共覓竹間寺更尋溪上橋平

湖認龍目斷嶺記蜂腰笑度荒陂去風吹酒半消

南徐州記

有龍目湖今失其所鶴林寺前山有名胡蜂腰者

度上人自閩中來

忽忽三看斗柄回邇來病鶴已摧頽乞醫耆域吾方爾  
問疾毗耶子合來歎息赤髭渾似舊喜懽青眼不徒開

何時趺坐寒窓下共聽崩崖萬壑雷

調趙雙融居士二首

忽忽餉子一杯茶老眼蒙籠似有花  
莫倚淫坊現摩詰便望神呪禦登伽

平生不領魔宮女此老今參欲界禪  
莫道貧無卓錫地只令家有散花天

寄焦山園禪師二首

渺渺城東路焦仙有舊廬  
嘗聞大雄議真合嬾融居貧

病飄流際艱難問訊初一庵容聽法吾老合捐書

憶昨扁舟去春江淩水波相逢一瞬頃所得萬金多妙  
解忘羈絆初心寄琢磨靈山他日會為記老頭陀

送王季裴往行在

子家本南燕我籍亦東魯天涯兩淪落遷徙無定所一  
朝聞剝啄三歲想眉宇跢然轉蓬地剩欲相就語風帆  
不貸人索別遽如許子才於用多蓄眼吾未覩布衣諸  
生耳而乃中健武恢恢獵德網取士倍於古韓閭寧負

秦晉材仍用楚由余初不棄況子自中土忽忽一杯酒  
吾為子起舞

贈謝德瞻

一杯濁酒潑春缸喜向燈前見老龐傾坐清談信冰玉  
傳家妙語更澄江此時杜老錢三百何日虞卿壁一雙  
聞道平生同學友半驅箱馬踏逢逢

寄日新

好在東吳客歸期尚未聞已看梅里月可憶蒜山雲仕

路雖投劍詩壇定策勲他年一盂飯扶耒待君分

題日新梅室向在杭日所居有此今遷居虞山

矣禪房花木深常建題虞山寺詩也虞山舊

名破山

阿連清標真拔俗人道妙年能顧曲那知晚歲厭囂塵  
歸種寒花伴幽獨西湖絕境天為破東閣新詩手親錄  
澤門之哲何足道相對風搖兩冰玉今年還問破山禪  
老樹駸駸子當熟定將妙語絕根源可但開房麗花木

平生最憐三虎怒老境真成一變足何當襍被過君家  
共挽長條醉鄰添

崔仲才問詩於予作此贈之

日吾來此居時已聞子名墮地驥驤俊破殼陵伽鳴過  
我不憚勞琳琅照柴荆圖史備商榷辭章歎縱橫黃緣  
託末契歲月今崢嶸相望百里遠尚記十載情袖中河  
梁句規摹漢西京賞子圭璧姿愧我蝸蝓聲城廩反見  
迫欲語還自驚斯文煨燼餘作者夷跼并苦匱不耐秀



涇流自為清差池百年內望子為長城已知蓄積富更  
在淘汰精君看上歲田寧可鹵莽耕石槃久則穿誓勿  
寒此盟床頭有濁酒會與子同傾

大疫聞德厚病雖少愈而苦未能愈

棘人元自瘦沉復病相侵鍾趙妖猶昔岐雷術謾令昏  
昏藥應倦忽忽日殊深安得詹何輩瀾翻慰此心

蠹齋鉛刀編卷六

欽定四庫全書

蠹齋鉛刀編卷七

宋 周孚 撰

古律詩

德裕久不見過賦此詩邀之

頃年來卜西里居知與吾子同枌榆趙郎過我問信初  
袖中雋子所著書短牋小字紛蚍蜉我初讀之意魁梧  
間若不識深愧渠驚風翩翩下屐蹻握手正自山澤癯  
短人雖短才則殊囊中雖見難須臾如君精悍誰能如

反以一飯先老夫窮年翰墨同染濡當時此約何可渝  
歲月忽忽霜生鬚空房肺疾愁相如楚然叩戶令則踈  
斯文綴緝誰助余顛沛望子一臂扶前邨雨足瓜芋區  
向日救廬新糞除祝子來過勿躊躇堆床敗簾翻蠹魚  
共倒濁酒羹瓠壺

戲題枯木

老矣木居士蒼皮今幾圍輪囷卧澗壑吾與汝同歸

贈仲才子和六言二首

視世崔郎一呖反予趙子三隅千里看兩鴻鵠一詩重  
百車渠

著論信子真輩疾惡真元叔徒雕龍固擅當世希驥不  
應老夫

題豫章先生像予嘗作看雲圖詩二首

吾生較此翁已落二紀後一時偶蹉跌千載難邂逅悠  
悠牂柯水冉冉我眉雲自恨詩語拙莫慰沉湘魂

今朝開此圖英氣尚髣髴酌予中郎酒酌此浪仙佛東

髮守孤學觸事多罵譏九原不可作吾老欲安歸

以老驥伏櫪志在千里為韻作八小詩贈伯永

閱人固無多每為予傾倒雖非矍鑠翁竟是鮮健老  
收駒汧渭間誰識此老驥伏櫪我何傷著鞭渠可畏  
抵寒唯麤絺調飢但晚粟切勿笑此翁此翁吾所伏  
行須置町畦禪要著槽櫪覆我千日酒面君九年壁  
忽忽把臂間各不負初志淵明荷鋤翁子雲執戟史  
激心秋月明觸事浮雲壞鳬鶴置勿論凡楚竟誰在

不取禾三百同箋偈八千歸歟建德國吾馬不須鞭  
人生老戒貪金隄捍河水他年渝此約何面視邑里

今秋麥大熟北客所願也戲作詩寄王季裴

覆塊初驚綠未蘇轉頭飛雪上齋盂腥鹹此際寧愁子  
餅拓今年不負吾蜀豉加鹽還記否湘蒿薦筍有詩無  
為君一洗南烹惡從此儒仙莫怨臞

晚步

汗垢不可耐晚涼眉始開孤筇信步去老袂覺風來驚

大那須爾癡蚊安在哉  
寥寥初月上却照老夫回

與游子卿別久矣比聞其調官端州有懷其人

二首

三吳望百越霜鵲亦逡巡  
疊疊山愁客泔泔瘴迫人  
老慵吾自厭聲聞子當頻  
莫作飄流想寒梅不負春  
子宦高要去扁舟早晚回  
曾逢歸雁否幾見墮鷺來  
老去腰猶折誰能輟少推  
他年相遇處吾馬亦虺隤

懷顯上人時在江州次其舊所作詩韻寄之已

卯夏予始識之于城西王氏墳庵

長號西山雲見子單闕夏孤生九死餘相遇天所借崎  
嶇易寒暑荏苒問田舍流萍忽復散皓月耿清夜孤筇  
子何往征馬吾屢跨空餘碧雲詩十襲悶蘭麝匡廬富  
清景得子更增價他年東林遊吾猶廁陶謝

寄湯朝美

綠樹陰陰噪莫蟬雀羅門戶更蕭然平生流輩今誰在  
鄉里衣冠子最賢老境幸逢傾蓋語畏途當記說車篇



荷鋤端欲相隨去却恨初無二頃田

八月九日晨步至鶴林寺遇一上人

踽踽身何向飄飄意自佳流年感秋燕幽興續晨鴉朱

墨終年累江山著處家寒泉無用汲吾病不禁茶

適有是語

張彥勛自建康來相見留三宿而去且言李先

生新亡張友聖俞之亡久矣

萬事紛紛一夢中虛堂相對且從容蟄龍老鶴知何往  
社燕秋鴻喜再逢陳迹只今空自記莫年非子欲誰從

蒼崖促轡還如許孤負黃花酒一鍾

時去重  
九五日

病起懷陳道人

卧病久不出四郊霜葉紅摧頽元屬我鮮健不知翁莫  
惜書頻寄深思酒一中移心未得法君去亦匆匆

張乖  
崖翁

嘗語人云子病中  
曾得移心法否

崔子虛以公檄出糴作詩寄葉伯永且言其道  
途之艱因次韻以寄

詩來君馬歎玄黃正坐鹽車道路長倒壑枯槎無復綠

並品殘菊尚餘香眼看落日還應眩心對寒溪却暫涼  
昔日維摩君記否邇來衰病亦懷鄉

再次深字韻寄日新

濁酒青燈語夜深短琴相與作南音當時懷越悲莊舄  
此日游吳憶季心日莫飢鴉無定止天寒孤雁自悲吟  
遙憐策杖蒼煙外舍北梅花正背陰

喜陳道人自泰州來作此詩留之

光風轉芳樹子向毗陵去霜風振枯荻子自海陵來悠

悠萬里江一葦安可抗浮杯不作難子亦石肺腸文章  
一小技知我獨子耳食貧強折腰此復愧於子草草具  
一餐芋火對嬾殘孤筇勿遽往歲莫方沍寒

頭風

陽虛已宜病冬癘復參同老耳時吹雨羸軀未可風昔  
鍼空自驗今檄竟誰工製帽狐皮在兒童勿笑翁

再寄湯朝美

夙疴苦牽纏舊學久廢忘閉門老叔夜慵惰古無上朋

知音問絕正復相舐望獨餘思子心砥柱閱寒浪作書  
往問訊聞子亦微恙深憐三醫勤却歎五鬼妄新詩勤  
諷誦渠魄自應喪吾儕曉天星齒髮已非壯羈孤寡會  
合尚復困此障衝風戰寒林落日翳疊嶂軒車何來遲  
為子倒家釀

命瞻錄近詩寄日新

涉世殊無味言詩粗有芽爾能明瑟僎吾不憚車斜老  
管元江葦寒牋更蜀麻因書寄癡叔刺為乃翁誇

游元著作江天莫雪圖贈朱元禮要余賦

艤舟洞庭三日雪一夢十年今白髮君家此圖忽墮前  
便擬寒流泛秋葉玉花淅淅紛長空征鴻不度天無風  
批岳暗水咽哀玉並溪古木僵寒銅李成不生郭熙死  
問君今世誰能此羣兒丹鉛較形似我識此翁非畫史  
坐來正復覩我顏試問倦鳥何時還少文已老塵埃間  
從翁乞我松陵山

正月五日寄陳道人

戊子

衝寒索去一何忙當日詩盟忍遽忘  
薄宦於人信箕斗老懷惟子不參商  
自憐勝日方懸榻好趁春風便促裝  
弱歲宦心雖淨盡新年佛法要商量

靈齋鉛刀編卷七

欽定四庫全書

蠹齋鉛刀編卷八

宋 周孚 撰

古律詩

贈伯永

不作馬前拜肯為牛下歌窮途食藥易荒歲啗瓜多士  
固難推挽渠仍不揣摩黃禾起羸馬歎息奈君何

奉寄滿足窟主王雅州所居也

知君投老竟誰逢摩度羅城宿契同妙語幸陪三日款



病懷頓失十年窮向時尺鷃嗟渠輩今日冥鴻信此翁  
莫惜平生太玄草君山元自識揚雄

寄日新并東蘇庭藻時在秀州

漕河千里流十日可往返風帆晝夜至子獨音問罕平  
生雖畫沙落紙龍蛇滿不應孟公豪直作叔夜懶豈云  
附炎熱正恐厭衰散交遊半鬼錄老病僅餘喘久為後  
輩玩智與髮俱短徵書子勿怪炙手借餘暖向時蘇季  
子堅操石可轉邇來亦效顰煩子更推挽併將百篇詩

慰此昏病眼

閭丘仲時清晨見過作此詩遺之

子來始晨炊飯糜語未盡豐鍾九秋鳴歷歷有餘韻  
昔年不見子子學乃頻進吾州士冀北子實千里駿  
緬懷十載語至此方盡信滔滔大河流可借九里潤  
衰年舊學廢得安闕親近明牕兩趺坐日永失餘困  
世情貧更薄吾貧老亦鈍得與田蘇游從今復何恨

贈楊德雋

頃年聞子名蹀躞天馬駒初疑但秦豪豈料還魯儒理  
當久騫騰術業誰不如尚淹惠文冠更讀城旦書一語  
不相應屢捋猛虎須長松表寒林信與蘿蒿殊塵埃埽  
胷次一見氣少蘇念子如孤雲漠漠天一隅骭骿固當  
爾顛沛誰為扶子看獨鶴歸睢盱有羣烏勉旃太行路  
勿令摧子車

寄東觀聶道士

幽憂忽忽未能除濁酒相逢輒倩沽老語參同真石友

高懷一見只臞儒當時共歎遼東鶴此日還思葉縣臯  
老柳吹綿春有幾會須重醉紫瓊腴

戲贈楊德駿

風流楊伯起相遇紩髯城逸思何軒豁高懷更坦平秦  
冠空自累漢賦幾時成莫作敲枰想駕鵞亦易驚

送廷藻兼呈楚州通守杜丈

相從嘗恨十年遲握手勿勿每日疑風艇烟帆還此日  
隙燈籬井定何時試看子學猶難售須信吾窮未易醫

千里同風杜夫子可能時寄彈丸詩

次前韻呈杜丈

老去休嗟見事遲蘇郎有語不當疑驚看渠學非前日  
悔奉公遊已後時襌襪只今還自笑膏肓從昔更誰醫  
時花俚服空爭巧須信人間自有詩

謝杜丈見過

短章韻墮麈大篇諧韶濩詩中晏平仲執鞭所欣慕相  
望一水遠匏繫未得去軒車賁窮巷閭里亦驚誤向時

蘇李子嘗有過情譽輕身先匹夫豈不以渠故節簷一  
席地坐語西日莫袖中石鼎詩未出吾已懼十年風雅  
學狹徑多窘步譬如策駑跛行此九折路書須圯下得  
禪有鰲山悟祈公不惜口更舉末後句

同范三哥訪鑒長老鑒犍為人而挂錫金山

惜惜山月照峨眉未暇西游鬢已絲勝日來陪巨卿友  
莫年親見德雲師解除鬚髮元非錯肯老山林更自奇  
趺坐繩床兩無語此心真有幾人知

口占送汪元章兼東述之同年

君行社燕前老意倍淒然  
離思秋聲裏歸程夕照邊  
久歲和氏壁行著祖生鞭  
為語同門友吾貧亦去年

有懷杜丈仲微

弱歲元知有此翁  
寸莛嘗記昔春容  
貞元名士渾無幾  
正始遺音僅此逢  
別後篇章應自課  
老來伏臘定誰供  
飛鴻過盡空回首  
倦客新年更自慵

次韻德裕

此郎筆力如江漢收卷波瀾作此嬉三歎方驚永嘉末  
兩章還到建安時祇知妙語能祛瘡可悟虛名不療飢  
同病同憂有如此向來吾亦蠹魚癡

題劉元畸書舍

不厭屠龍學吾衰祇見公勤如袁伯業清甚陸龜蒙身  
健何妨老詩工莫厭窮要為千歲託試判一生功

劉氏慈義亭

此後戊子

天公殊憤憤此語不須疑已失黔婁婦還亡伯道兒孤



亭時一慟行路不勝悲會倩韶釣手重為楚些詞

題游元著瀟湘晚景圖

與翁家世俱東魯不記翁遊曾到楚看翁寫此六幅圖  
怪翁筆力能如許孤烟合處漁著邨老雁歸時帆入浦  
丹楓翻翻江氣寒莫雪初晴山月吐杜陵野老經行處  
度支病郎用心苦惟翁妙思自暗同楚玉何曾識神女  
信知胷中著雲夢不止豪端挾風雨祇今小紙弄姿態  
氣韻酸寒終愧古蜀山秦樹各異狀所向一律人笑汝

誰能為證張與吳十年此病翁今無

秦士史慶臣好詩而喜俠飲之酒而贈以是詩  
踏遍荆吳鬢欲華夢中煙雨暗三巴白鹽赤米猶能飯  
碧巘清流便當家子黨昔誰憐范叔吾門今始識劉叉  
驚斯賊食雖堪笑相祝無勞置齒牙

陳季陵侍郎生日二首

政簡官多暇刑清獄屢空嘗從父老語俱話使君功鴻  
寶寧資汝黃麻正待公仁人自宜壽天意與民同

聖世唐虞際公才稷契間清仍能律俗直更不容姦比  
歲頻分閫今年定賜環從來香案吏合自廣桑山

史慶臣止酒

韓時孤憤客楚境獨醒翁莫景還誰似高懷只子同已  
亡千日醉可更十年窮吳稻新春白猶堪慰轉蓬

慶臣和巴字韻見遺復次韻

獨鶴投林畏莫鴉向時入蜀強劉巴瘴鄉自古難為客  
老境無人不念家一飯肯來從我覓百錢何惜為君義

麤繒大布差安穩莫學渠儂戲虎牙

次湯士美送蔡季任韻寄士美二首

君才元落落吾語只平平意廣真堪笑情親却自驚瘦筇殊未到短笛為誰橫肺病雖羸甚猶能倒屣迎

洮湖南北路投老始來游少作三年別當為二頃謀間關元遍歷衰謝合歸休更問西莊友能容此客不

次韻士美求予舊詩之句

寒江不療風雅渴一讀新詩黑華髮鳴岡雛鳳固自諧

歷塊名駒寧復蹶十年韜縮不願售須信桺藏定干越  
昔人羈窮正坐此落落君心抵金鐵蟄蟲欲作雷破柱  
大勝秋蛩弔寒月猗那清廟君所知莫學杜陵老翁窮  
徹骨

次韻邵公濟六言三首贈史千史自云嘗從邵  
學

閱子西山遺墨愛渠東周故家欲與俱鳴此日只今老  
眼昏花

學須有委有源約畧為君一言淳夫迂叟舊客無已醉  
翁嫡孫

貯腹古文奇字發篋長歌短行挽子縱談今夕小風時  
動簾旌

蠹齋鉛刀編卷八